

Novogodišnja poruka visokog predstavnika Valentina Inzka: U 2013. moguć je stvarni napredak

Kada je počela, 2012. je bila godina nade i novih prilika za BiH. I zaista, bio je postignut bitan napredak. Usvojeni su zakoni od značaja za vašu evropsku budućnost, usvojeni su budžeti, i napravljeni veliki planovi.

Međutim, nažalost, bojim se da će brojni bh. građani gledati na 2012. sa nezadovoljstvom, barem kada je riječ o politici. U najvećem dijelu, godina koja je iza nas bila je godina propuštenih prilika, što je usporilo ovu zemlju na putu ka prosperitetu, sigurnosti i punoj integraciji u evroatlantske strukture.

Što se tiče 2013., ja biram optimizam. Regija je krenula naprijed. Hrvatska će se 2013. pridružiti EU. Crna Gora je započela pregovore za članstvo u EU, a Srbija je dobila status kandidata. U 2013., BiH i dalje ima priliku da napreduje u istom smjeru kao i njeni susjedi. Međunarodna zajednica će učiniti sve što je u njenoj moći da vam pomogne da iskoristite prilike koje se nude.

Na primjer, osim prilike za približavanje EU, imate i stalno otvorenu ponudu od NATO-a. Nema pravog razloga da se sada ne krene naprijed.

Također se nadamo da će vaši lideri biti dovoljno mudri i konačno staviti tačku na blokadu u Mostaru. OHR je ove godine bio direktno uključen u zajedničke napore na ukidanju administrativne paralize u Mostaru, i nastaviti ćemo raditi sa svim stranama kako bi se to i postiglo. Kako bi to polučilo

uspjeh, stranke moraju postići dogovor o pravednom kompromisu od koga će koristiti imati svi stanovnici grada.

U Federaciji, lideri treba da prestanu sa svađama i da se, umjesto toga, fokusiraju na ekonomska pitanja i borbu protiv kriminala i korupcije, između ostalih prioriteta.

U Republici Srpskoj, iako je entitet u suštini dobro funkcionirao, neki političari iz Banje Luke treba da prestanu trošiti vrijeme na antidržavne inicijative koje samo odvlače pažnju sa daleko značajnijih potreba, kao što su nova radna mjesta. Kada stranke u 2013. počnu provoditi dogovore postignute u novim partnerskim odnosima, morat će sačuvati reforme koje su već postignute i ispoštovati međunarodne obaveze.

Jasno je da se u 2013. mora uraditi puno posla. Taj posao je moguće uspješno završiti samo ukoliko se stranke fokusiraju na rješavanje problema sa kojima se građani suočavaju.

Smatram da se u narednoj godini može postići stvarni napredak. Međunarodna zajednica je opredijeljena da pomogne četiri miliona građana ove zemlje da iskoriste zaslužene prednosti iz prilika koje im se nude. Građani ne žele još više retorike i još više blokada. Oni žele konstruktivnu politiku i praktična rješenja. Mislim da, uprkos razočarenjima iz 2012. godine, politički lideri to mogu postići u 2013.